



Rabu, 20 Oktober 2021
Ogen: Kuan-kuanen 23:19-21



Megermetlah Nandangi Perdalinen Geluh



La it kin jelma la pernah jumpa persoalen? Anak-anak si kitik denga pe lit persoalenna, anak remaja ras si enggo dewasa pe lit persoalenna, kalak si enggo metua pe lit denga persoalenna. La lit manusia si la pernah ikenai persoalen. saja persoalen e banci ipekitik, entah ikurangi. Asa bancina ula bere dalam si erbahansa murah jadi persoalen. Guru hikmat ngajari kita wari enda, uga erbahansa la murah jadi persoalen i bas ndalani kegeluhen. *Sipemena*, jadiah pentar. Ertina beluh muat keputusan si mehuli ku bas kegeluhenna, la murah ipengaruhi bujukan kalak jahat entah pengajaren si jahat. Kalak pentar ibentengina dirina alu kata Dibata, tiap wari iogena Kata Dibata e, iukur-ukurina, itamakenna ku bas pusuhna. Ipediatna kata Dibata e erkuasa bas dirina janah idalankenna kata e tiap wari. Em si erbahansa ngasup ia muat keputusan si payo kempak dirina. *Peduaken*, Megermet. Ertina teliti, cermat, mengawasi, mediate nandangi sekelewet, iperdiatekenna karakter ras biak teman ras lingkungenna.

Nina guru hikmat, Ola pertemani kalak pemabuk, dengen kalak merangap. Pemabuk ras merangap la ngukuri masa depanna, ras la ngukuri sekelewetna. Emaka jadi musil me ia. Adi musil kegeluhen uga pa pe malala turah persoalen. Rubat ersenina ras turang, rubat ras sekelewet, rubat ras anak jabu. Keperluan geluhna pe la terlitkenna, termasuk ngelitken gonjena. Adi kalak merangap, bana kal ngenca iukurina, si la arus jadi sikerajanggenna pe iusahakenna alu erbage cara gelah jadi man bana. Kalak si bage pe labo ngukuri kiniulin kalak si deban. Adi megermet kita nandangi biak ras karakter teman, ras beluh kita muat teman si tepat ras kita, e banci engkurangi persoalen si lit bas kegeluhenta. Kepentaren Dibata e lah jadi kepentarenta i bas erteman gelah mehuli perdalinen geluhta.